

I

Կ. ՊՈԼՍԻ ԵՎ ՋՄՅՈՒՌՆԻԱՅԻ ՀԱՅ ԱԶԳԱԲՆԱԿՉՈՒԹՅԱՆ
ՏԵՂԱՀԱՆՈՒՄՆԵՐԻ ՇՈՒՐՁ
(1915–1916 թթ.)

ԱԼԲԵՐՏ ԽԱՌԱՏՅԱՆ

Տեղահանությունները և աքսորը, որպես ցեղասպանության բաղկացուցիչ մասեր, ինչպես հայտնի է, պետք է ընդգրկեին նաև Կ. Պոլսի և Ջյուրտնիայի հայ ազգաբնակչությանը: Եվ միայն Առաջին աշխարհամարտի ռազմաքաղաքական իրադարձությունների ընթացքն ու երիտթուրքական կառավարողների կողմից դրանցով պայմանավորված մոտեցումները խոչընդոտեցին, որ նշված հանրությունները զերծ մնան զանգվածային տեղահանումներից ու ոչնչացումից՝ ենթարկվելով դրան ուղղված մասնակի, բնակչության սահմանափակ քանակներ ենթադրող գործողությունների: Այլ կերպ ասած, մասնակի տեղահանումներն ընդհանրական տեղահանումների առաջին փուլն էին, որոնք իրենց հետագա ծավալները չստացան: Մայրաքաղաքի հայության վերացման գործողությունները երիտթուրքերը սկսեցին, ինչպես ամենուրեք, նախօրոք մշակված սխեմայով. տղամարդկանց գորակոչ, ապա մտավորականության աքսոր՝ բանակում և աքսորի ճանապարհների նրանց ոչնչացնելու պայմանով, այնուհետև բուն բնակչության ներքնախավերից սկսած մյուս բոլորի տեղահանությանն ուղղված միջոցառումներ:

Դարդանելի ձգձգված գործողության ավարտին իրենց հույժ կասկածելի հաջողությունները թևավորեցին երիտթուրքական կառավարողներին՝ բնաջնջման ծրագիրը գործնականի վերածելու ուղղությամբ: 1915 թ. ապրիլի 24-ը, ըստ էության, պոլսահայերի տեղահանության սկիզբն էր, որ նախապես տարածվեց մտավորականության վրա: Այստեղ նշված օրը և դրան հաջորդած շաբաթների ընթացքում պոլսահայ համայնքը փաստորեն զրկվեց իր մտավորականությունից՝ ձերբակալվեցին ու աքսորվեցին հազարավոր մարդիկ: Արևմտյան Հայաստանում զանգվածային տեղահանումներն սկսվելուց առաջ և այդ ընթացքում Կ. Պոլսի պատրիարքարանը մեկուսացվել էր գավառներից: 1914 թ. հոկտեմբերին Օսմանյան Թուրքիայի՝ պատերազմի մեջ մտնելուց հետո և 1915-ի սկզբներին արգելվեցին պատրիարքարանի գրագրությունները վիճակների ու թեմերի հետ, իսկ տեղահանությունների վերաբերյալ պատրիարքարանի ստացած լուրերը հերքվում էին իշխանությունների կողմից: 1915 թ. մայիսի 27-ին երիտթուրքերը հրապարակեցին

Կասկածելի անձանց արտաքսման մասին ժամանակավոր օրենքը, որով օսմանյան բանակի հրամանատարներին ոչնչով չսահմանափակված լիազորություններ էին տրվում հայ ազգաբնակչությանն իր բնակավայրերից տեղահանելու գործում¹։

Վերադառնանք Կ. Պոլսի հայությանը։ Մի քանի շաբաթվա ընթացքում այստեղ ձերբակալվեցին 2345 գործիչներ, որոնց ոչ մի մեղադրանք չներկայացվեց և որոնց մեծ մասը հետագայում սպանվեց²։ Գերմանացի մասնագետների հետ համագործակցող Կ. Պոլսի ոստիկանական վարչությունը իր նախապես կազմած ցուցակներն էր ուղարկել թաղային ոստիկանատներ։ «Ղրկուած ծրարն էր, որ բացուած էր ու նախապէս ճշդուած այդ ցանկէն քիչերը միայն կրցան ճողոպրիլ։ Այդ քիչերէն մէկն ալ ես էի՝ Շաւարշ Միսաքեանին, փրոֆ. Ա. Խաչատուրեանին, Յովհաննէս Զեօկիւրեանին, Գէորգ Մեսրոպին եւ քանի մը ուրիշներու հետ մէկտեղ»³, – գրում է Հ. Միրունին։

Միաժամանակ, օսմանյան իշխանություններն հարվածն ուղղեցին մայրաքաղաքի հայկական մշակութային հաստատություններին, որն իր ենթատեքստում ուներ առհասարակ Կ. Պոլսը հայաթափելու պատրաստի ծրագիրը։ Թուրքերի վայրագ գործողություններին համակրանքով հետևող Գերմանիայի դեսպան Վանգենհայմը, ըստ էության կրկնում էր երիտթուրքերի պատճառաբանությունները մայրաքաղաքի հայերի վերաբերյալ։ 1915 թ. ապրիլի 30-ին ռայխսկանցլեր Բ. Հոլվեգին հղած իր զեկուցագրում նա գրում էր. «Այստեղի հայերի մեջ կան մի շարք քաղաքականապես ոչ լրիվ անվտանգ անձինք։ Նրանց, բնականաբար, պետք է փնտրել ակումբներում և խմբագրություններում գործող անդամների մեջ։ Չի կարելի չխոստովանել այն անհանգստությունը, որ պատերազմի անհաջող շրջադարձի դեպքում այս տարրերն առիթը կօգտագործեն՝ խռովություն սաղրելու։ Պահը հարմար էր՝ այս բոլոր կասկածելի անձնավորություններին մայրաքաղաքից հեռացնելու համար»⁴։ Մոտ մեկ ամիս անց, մայիսի 24-ին նույն Վանգենհայմը հեռագրում էր իր երկրի արտաքին գործերի գերատեսչությանը, որ Էնվերը մտադր-

¹ Գերմանիան և Հայաստանը 1914–1918. Դիվանագիտական փաստաթղթերի ժողովածու (այսուհետև՝ Գերմանիան և Հայաստանը), հ. 1, հրատ. և ներածութ. դոկտ. Յոհաննէս Լեփսիուսի, Երևան, 2006, էջ 29, В. Н. Да д р я н. История армянского геноцида. Ереван, 2007, с. 284.

² В. Н. Да д р я н. Նշվ. աշխ., էջ 284:

³ Յ. Միրունի. Ինքնակենսագրական նոթեր, Երևան, 2006, էջ 200:

⁴ Գերմանիան և Հայաստանը, էջ 162: «Ակումբներում և խմբագրություններում գործող անդամներից», իբր, ակնկալվող վտանգի մասին երիտթուրքական տեսակետը որդեգրած դեսպանի մտքերը վկայում են, որ 1914-ի վերջերին և 1915-ի սկզբներին իշխանությունները վերացրել կամ անգործունակ էին դարձրել Կ. Պոլսի հայերի մշակութային և կրթական հիմնարկները, այլև պարբերական հրատարակությունների մեծ մասը:

վել է «փակել մեծ թվով հայկական դպրոցներ, արգելել հայերեն փոստային թղթակցությունը, ճնշում գործադրել հայկական թերթերի վրա»⁵:

1915 թ. ապրիլին, երբ արդեն որոշված էր Կ. Պոլսի հայ մտավորականության ճակատագիրը, և որին տեղյակ չէր կարող չլինել գերմանական դեսպանությունը, վերջինս փորձեց հայերից քամել առավելագույնը՝ հոգուտ Գերմանիայի և նրա դաշնակից Օսմանյան Թուրքիայի: Դեսպանատան աշխատակից Մորթմանը դիմում է պատրիարք Զավենին՝ մի կոնդակով հորդորելու կովկասյան ճակատի հայ զինվորներին, որ նրանք չկոպեն թուրքերի դեմ: Պատրիարքը հրաժարվում է, հայտնելով, որ Ռուսաստանի հայերը դուրս են իր հոգևոր իրավասություններից և որ ինքը ընդամենը Էջմիածնի կաթողիկոսի փոխանորդն է Կ. Պոլսում: Նույն առաջարկը, ի դեպ, արվել էր Գր. Չոհրապին՝ նրա ձեռքակալությունից քիչ առաջ⁶:

Օսմանյան Թուրքիայի՝ պատերազմի մեջ մտնելուց ի վեր և հայ բնակչության հայաձանքները սաստկանալուն զուգընթաց, պատրիարքարանն անում էր հնարավորը՝ իրադրությունը ինչ-որ չափով մեղմելու համար: Հաճախակի դարձան, հայության կացության թելադրանքով, Խառն ժողովի նիստերը: Գավառներից բռթաբեր տեղեկագրեր ստացող պատրիարքը և ազգային վարչությունը իրենց ժողովներին խորհրդակցության էին հրավիրում համարում և հեղինակություն վայելող անձանց՝ Գր. Չոհրապին, Ա. Գասպարյանին, Ա. Անտոնյանին, Հ. Պոյաճյանին, Ռ. Չարդարյանին, Մ. Նաթանյանին և այլոց: 1914 թ. հոկտեմբերի 25-ին պատրիարքն այցելեց ներքին և արդարության գործերի նախարարներին՝ հայտնելով «հայ ազգին անձնուիրությունը հանդէպ օսմանեան հայրենիքին»⁷:

Պատրիարքարանի այս և հետագա բոլոր փորձերը՝ ողորջելու անհանդուրժող և միաժամանակ չքմեղացող իշխանություններին, ոչ մի ազդեցություն չունեցան: Պատասխանը եղան նոր գորակոչը, 1915 թ. սկզբներից՝ հայ զինվորների զինաթափումը և աշխատանքային գումարտակներում առանձնացնելը՝ նրանց ոչնչացնելու նպատակով: Մտավորականությանը ձեռքակալելուց հետո Կ. Պոլսում ձեռնարկվեցին քաղաքը հայերից ամբողջովին դատարկելու գործողությունները: Ապրիլի 29-ին հայ բնակչությանը պարտադրեցին հանձնել զենքերը⁸, ավելի շուտ նրանց դեմ ուղղված քարոզչական աղմուկը հիմնավորելու համար: Իշխանությունները քաղաքում հաջորդ հարվածն ուղղեցին պանդուխտ և արվարձաններում ապրող հայերի դեմ: Տարերային աքսորներից հետո այս մեկն արդեն կրում էր վարչականորեն կազմակերպված ձեռնարկի հատկանիշները, որ պատրիարքը թվագրում է

⁵ Նույն տեղում, էջ 30:

⁶ Զավենի պատրիարք. Պատրիարքական յուշերս. վաւերագիրներ և վկայութիւններ, Թեհրան, 2014, էջ 116:

⁷ Նույն տեղում:

⁸ Գերմանիան և Հայաստանը, էջ 28:

1915 թ. օգոստոսով. «Պոլսոյ գաւառացի ամուրիներուն տարագրումն ալ սկսած է երկու շաբաթէ ի վեր. ցարդ 4-5 հազար մարդ տարագրուեցան յանկարծական կերպով, իրենց գործերը երեսի վրայ ձգելով: Ասոնց մէջ ընտանիքի տէր ալ կայ: Այաշ եւ Չանդրրի արքայութեան ընտանիքներուն ալ ազդարարուեցաւ Պոլիսէն մեկնիլ, բայց յետոյ առաջքը առինք: Ասիկա սկզբնաւորութիւնն է Պոլսոյ հայութեան տարագրութեան...»⁹:

Գաւառացի հայերի արտաքսումները շարունակվեցին նաև հետագա ամիսներին: Ականատես պրոֆ. Հակոբյանը 1915 թ. հոկտեմբերի 15-ին գրում էր. «Պոլիս մարդ չկայ. փողոցները հայ չէք տեսներ: Մղութիւն և չգոյութիւն ահաւոր են: Գաւառացիներուն մեծ մասը Պոլսէն վտարուեցաւ»¹⁰:

Պանդուխտ հայերի հետ հաշիվները դեռևս լիովին չմաքրած՝ երիտթուրքական իշխանությունները ձեռնարկեցին բուն պոլսահայերի տարագրության գործը: Հայկական կոմիտեի նախագահ Յո. Լեփսիուսը 1915 թ. նոյեմբերի 29-ին գրում էր ռայխսկանցիներ Բ. Հովվեգին, որ Սոֆիայի Հայկական կոմիտեն իրեն հաղորդագրություն է ուղարկել, ըստ որի, «Հակառակ թուրքական կառավարության Կ. Պոլսի բարձրագույն իշխանությունների ներկայացուցիչների նախկին խոստումներին՝ սկսվել է նաև Կ. Պոլսի հայերի արտաքսումը: Մինչև հիմա արդեն արտաքսվել են 10.000 հոգի, որոնք մեծ մասամբ մորթվել են Իզմիթի լեռներում: Մնացած 70.000-ի արտաքսման ցուցակը պատրաստ է»¹¹: Կարելի է մակաբերել, որ խոսքն այստեղ հիմնականում վերաբերում է պանդուխտներին, որոնց արտաքսումները, ինչպես տեսանք, սկսվել էին դեռևս օգոստոսին և մասամբ՝ պոլսահայերին, որոնց ամբողջական տեղահանությանն էին պատրաստվում իշխանությունները: Ավելացնենք, որ դեկտեմբերի 4-ին նույն տեղեկատվությունը Բեռլինից Կ. Պոլսում գերմանական դեսպանությանն է հղել արտաքին գործերի փոխնախարար Ա. Յիմերմանը՝ խնդրելով վճռականորեն բողոքել, եթե իր ստացած հաղորդումը ճիշտ է¹²: Դրանից երեք օր անց՝ դեկտեմբերի 7-ին, դեսպան Մետերնիխը հայտնում է ռայխսկանցիներ Բ. Հովվեգին, որ ոստիկանապետի տեղեկության վրա հենվող մի արժանահավատ կողմի համաձայն, «Վերջերս Կ. Պոլսից ևս Անատոլիա է քշվել մոտավորապես

⁹ Ջ ա լ է ն ա ռ ք ե ս յ. Պատրիարքական յուշերս. վաւերագիրներ և վկայութիւններ, Գահիրէ, 1947, էջ 148:

¹⁰ Վ. Մ ա լ է գ ե ա ն. Ճամբուս ծայրը, հ. Բ, Փարիզ, 1955, էջ 92:

¹¹ Գերմանիան և Հայաստանը, էջ 353:

¹² Նույն տեղում, էջ 354-355: Տե՛ս նաև Յո. Լեփսիուսի «Գաղտնի տեղեկագիրք. հայ ժողովրդի ջարդերը» (Երևան, 2003, էջ 134), որտեղ նշվում է, որ ընդամենը տարագրվեց 10.000 հայ և ոչ մի տեղեկություն չկա նրանց նոր բնակավայրի մասին: Ուշագրավ է Ռ. Գևորգյանի տվյալը՝ Կ. Պոլսից և Չանաքկալէից (Գելիբոլու, Դարդանէլի շրջան) արքայութեան հայերի թիվը նա հաշվում է 40 հազար մարդ (R. G e v o r k i a n. Soykrımın İkinci Safhası, İstanbul, 2011, s. 32):

4000 հայ, և որ Կ. Պոլիսը աստիճանաբար մաքրվելու է դեռևս այնտեղ ապրող 80.000 հայերից, այն բանից հետո, երբ ամռանը Կ. Պոլսից տարագրվել է մոտավորապես 30.000 հայ և 30.000-ն էլ փախել է»¹³:

Երկու հաղորդագրություններում էլ՝ և՛ Լեփսիուսի, և՛ Մետերնիխի, Կ. Պոլսի հայ բնակչության թվաքանակը մեծապես նվազեցված է: Ակնհայտ է, որ դրանցում շրջանառվող թիվը՝ 80.000-ը, իր հիմքում ունի երիտթուրքերի պաշտոնական վիճակագրական տվյալը. Համաձայնության պետությունների կողմից հայերին բնաջնջելու հայտնի հայտարարությունը հերքելու իր փորձերում թուրքական Հավաս գործակալությունը պոլսահայության թիվը իջեցնում էր 77.835-ի¹⁴: Այսուհանդերձ, մի կողմ թողնելով Կ. Պոլսի հայերի թվաքանակի խնդիրը, որ կարոտ է ճշտումների, նկատենք, որ Մետերնիխի դիտողությունը ճիշտ էր այն իմաստով, որ երիտթուրքերը շարունակելու են մայրաքաղաքից հայերի արտաքսման գործը:

Կ. Պոլսից տեղահանումները շարունակվեցին նաև 1916 թ. առաջին կեսին: Մայիսի 12-ին պատրիարք Չավենը գրում էր գերմանական դեսպանին, որ «Կ. Պոլսից և Զմյուռնիայից ամեն շաբաթ այլևայլ առիթներով արստրվում են հարյուրավոր տղամարդիկ», և որ նրանց ունեցվածքը բռնագրավվում է և վաճառվում¹⁵:

Սա մեր ունեցած վերջին տեղեկությունն է Կ. Պոլսում և Զմյուռնիայում իրականացված տեղահանումների վերաբերյալ: Թեև, ասենք, որ նույն Չավեն պատրիարքը իր հուշերում գրում է, թե երիտթուրքական կառավարությունը 1915 թ. դեկտեմբերին հայերի հալածանքները դադարեցնելու առթիվ գերմանական ու բուլղարական դեսպանների համառ դիմումներից հետո որոշել է հանգիստ թողնել մայրաքաղաքի ժողովրդին և չտեղահանված բնակավայրերի (Զմյուռնիա, Քյոթահիա և այլն) հայերին, և որ «դեպքերը եկան հաստատելու այս բանը»¹⁶:

Ճիշտ չէր լինի, սակայն, պատրիարքին մտքերի հակասականություն վերագրել: Իր հուշերում երիտթուրքերի՝ հայերի տեղահանումները դադարեցնելու մասին նա արտահայտվում է որոշակի վերապահումով («ըսուեցաւ թէ որոշուած է»), ոչ այնպես հաստատ, ինչքան տեսնում ենք գերմանական դեսպանին նրա հղած՝ վերոհիշյալ գրության մեջ: Անտարակույս, պետք է արձանագրել, որ 1916 թ. մայիսին կամ դրանից ոչ շատ առաջ, Կ. Պոլսում և Զմյուռնիայում շարունակվել են հայերի տե-

¹³ Գերմանիան և Հայաստանը, էջ 355–356:

¹⁴ Ձ ա լ է ն ա ր ք. նշվ. աշխ., Գահիրե, 1947, էջ 108:

¹⁵ Армянский вопрос и геноцид армян в Турции (1913–1919). Материалы Политархива МИД Кайзеровской Германии. Сост., автор предисл., введ. и примеч. В. А. Микаелян. Ереван, 1995, с. 327.

¹⁶ Ձ ա լ է ն ա ր ք. Պատրիարքական յուշերս, Թեհրան, 2014, էջ 208, 211: Օտար հեղինակներից Ռ. Նոգալեսը իր հերթին նշում է, որ տեղահանումները դադարեցվեցին Գերմանիայի և Ավստրիայի միջամտության շնորհիվ (R. Nogales. Four Years Beneath the Crescent. New York-London, 1926, p. 135):

դահանումները՝ դարձյալ մասնակի ու ոչ ընդհանրական ծավալներով: Այս ամենը կարծեք, հանրագումարի է բերում Յո. Լեփսիուսը, ով նշում է, որ Կ. Պոլսում դեսպանների դիմումներից հետո թուրքական կառավարողները «հրաժարուեցին ընդհանուր տարագրության միջոցները տարածել նաև Պոլիսի եւ Իզմիրի հայ ազգաբնակչությունների վրայ: Սակայն լռելեայն շարունակեցին Կ. Պոլիսի հայերի տարագրությունը: Ընդամենը տարագրուեց 10 հազար հոգի եւ ոչ մի տեղեկություն չկայ նրանց նոր բնակավայրերի մասին»¹⁷:

Առանց այլ, արխիվային կամ վավերագրական տվյալների, կարծում ենք, դժվար կլինեք վերականգնել Կ. Պոլսից տեղահանված հայերի գոնե մոտավորապես թիվը: Յո. Լեփսիուսը, ինչպես տեսանք, 10. 000 տեղահանվածներ է հաշվում 1915 թ. նոյեմբերի վերջերին, նույնքան, որքան Սոֆիայի Հայկական կոմիտեն և Գերմանիայի արտաքին գործերի գերատեսչությունից՝ Ցիմմերմանը: Բայց դեսպան Մետերնիխը, իր հերթին, ինչպես տեսանք, «արժանահավատ կողմից» տեղեկացել էր, որ 1915 թ. ամռանն արդեն Կ. Պոլսից տարագրվել էր մոտավորապես 30.000 հայ, որոնց նա միացնում է «վերջերս (գրում է 1915 թ. դեկտեմբերի 5-ին – Ա. Խ.) Կ. Պոլսից Անատոլիա քշված մոտավորապես 4000 հայի»¹⁸: Եթե սրանց ավելացնենք պատրիարք Ջավենի՝ գերմանական դեսպանին 1916 թ. մայիսի 12-ին հղած տեղեկագիրը՝ ամեն շաբաթ Կ. Պոլսից և Զմյուռնիայից հարյուրավոր տղամարդկանց արքորելու մասին, ապա պարզ կդառնա, որ Կ. Պոլսից արքորվածների թիվը հաստատապես շատ ավելին է, քան 10.000-ը:

Կոստանդնուպոլսից արքորյալների հետ, ինչպես և ամենուրեք, թուրքերը վարվեցին սովորական դարձած կարգով. տեղահանված խմբերը կա՛մ լրիվ, կա՛մ էլ գրեթե լրիվ ոչնչացվում էին ճանապարհներին, այնպես որ նրանցից քչերն էին արքորատեղի հասնում¹⁹: Երիտթուրքական կուսակցության շրջանային գործիչների դատավարության նիստերից մեկում դեղագործ Գրիգորը վկայում էր, որ Ստամբուլից Չանքրը տարագրված 180 հայերից միայն 30-ն են ողջ մնացել²⁰:

Անցնենք Կ. Պոլսի հայ ազգաբնակչության թվաքանակին, որ աղերսվում է երիտթուրքական կառավարության ցեղասպան ծրագրին: Այդ թվաքանակն ըստ հնարավորին նվազ ցույց տալու և հետագայում պատասխանատվությունից խուսափելու նպատակն էր հետապնդում այն, որ թուրքական Հավաս գործակալութ-

¹⁷ Յո. Լեփսիուս. նշվ. աշխ., էջ 134:

¹⁸ Գերմանիան և Հայաստանը, էջ 353:

¹⁹ Նայիմ բեյի հուշագրության մեջ Եփրատի ափերն արքորված հայերի խմբերում կային Ստամբուլի շրջակայքի բնակիչներ (տե՛ս Ավ. Փափագյան. Հայերի ցեղասպանությունը ըստ երիտթուրքերի դատավարության փաստաթղթերի, Լոս Անճելես, 2005, էջ 17):

²⁰ Մ. Անուսյան. Երիտթուրքերի 1919–1921 թթ. դատավարությունների վավերագրերը ըստ օսմանյան մամուլի, Երևան, 2011, էջ 100:

յունը ավելի, քան 200.000-անոց պոլսահայերի թիվը իջեցնում էր մինչև 77.835 մարդու, որոնցից, իբր, ձերբակալվել են ընդամենը 230 հոգի՝ իբրև հեղափոխական շարժման մասնակիցներ²¹: Բոլոր դեպքերում, Կ. Պոլսի հայ ազգաբնակչությունը, անկախ իր թվաքանակի վերաբերյալ տարակարծություններից, ենթարկվեց ոչ թե ընդհանրական, այլ մասնակի տեղահանումների: Ինչն էր զսպում, կամ ավելի շուտ, ստիպում էրիտթուրքերին՝ հետաձգել այլևս գործի դրված ոչնչացման ծրագրի վերջնական արարք: Չավեն պատրիարքը կարծում էր, որ Եվրոպայի և առհասարակ Համաձայնության երկրների մամուլում էրիտթուրքական դահիճների գործողությունների դատապարտումը վերջիններիս մղեց 1916 թ. սկզբներից անցել որոշ զիջողությունների, այսինքն.

«Ա. մայրաքաղաքին ժողովուրդը իր տեղը հանգիստ թողուլ:

Բ. Չտեղահանուած վայրերու (ինչպէս Իզմիրի, Քէօթահիայի եւ այլն) հայերը այլևս իրենց տեղերը ձգել:

Դեպքերը եկան հաստատելու այս բանը, որ հակառակ շատ մասնակի յաջողութիւն ըլլալուն՝ դարձեալ բան մը չէր»²²:

Այնուհետև պատրիարքը ևս մեկ հավելում է անում. կառավարությունն այդ որոշումն ընդունել է իր դաշնակիցների ճնշման տակ²³:

Ա. Բարբին կարծում է, որ Կ. Պոլսի և Չմյուռնիայի հայերը կարծես թե խուսափեցին այդ կոտորածից և մասնավորապես պոլսահայերը՝ իրենց բազմամարդության և այդ քաղաքում չեզոք երկրների ներկայացուցչության շնորհիվ²⁴:

Չավեն պատրիարքը, Յո. Լեփսիուսը և Ա. Բարբին էրիտթուրքերի՝ կոտորածներից ձեռնթափ լինելու պատճառը, ինչպես տեսանք, համարում են եվրոպական երկրների միջամտության կամ ճնշումների գործոնը: Այս ամենը, անշուշտ, կար,

²¹ Չ ա լ է ն պ ա տր ի ա ր ք. նշվ. աշխ., Թեհրան, 2014, էջ 141–142: Այս կամ այն չափով էրիտթուրքական այս կեղծված վիճակագրությունն էին աչքի առաջ ունենում թուրք պաշտոնյաները, երբ Կ. Պոլսի հայերի թիվը հաշվում էին 75–80 հազարի սահմաններում (տե՛ս Գերմանիան և Հայաստանը, էջ 361, 355–356): Հակադրվելով պաշտոնական թվին՝ գերմանական դիվանագետ Մորթմանը հայտնում էր, որ այդ թիվը (75.000-ը) շատ ավելի պակաս է իրականից, այլև հաշվում էր 120–130 հազար հոգի (նույն տեղում, էջ 361): Ա. Բարբին (Բարբյուս) նշում է՝ 150 հազար մարդ (տե՛ս А. Ба р б и. В стране ужаса. Мученица Армения. М., 2008, с. 56), իսկ գերմանացի կրոնական և գիտական գործիչները, այդ թվում և Լեփսիուսը, նշում են, որ այդ թիվը հասնում է 180.000-ի (Գերմանիան և Հայաստանը, էջ 332): Կարելի է կարծել, որ նրանք նկատի են ունեցել Կ. Պոլսի հայերի թիվը՝ 1915 թ. ապրիլին և հոկտեմբերին իրականացված արքուններից հետո, որովհետև նրանց դիմումը գրվել է 1915 թ. հոկտեմբերի 15-ին (Գերմանիան և Հայաստանը, էջ 330):

²² Չ ա լ է ն պ ա տր ի ա ր ք. նշվ. աշխ., Թեհրան, 2014, էջ 211:

²³ Նույն տեղում, էջ 213:

²⁴ А. Ба р б и. Նշվ. աշխ., էջ 56:

բայց մեկ վերապահում կարելի է անել՝ ընդամենը զսպող և հետաձգելու մղող նշանակությամբ: Հակառակ կայզերական գործերի հավատարմատար ֆոն Նոյրաթին, դեսպան Մետերնիխին և այլոց էնվերի, Խալիլի ու Ջեմալի տված խոստումներին (1915 թ. նոյեմբերին և դեկտեմբերին)²⁵, Կ. Պոլսի հայերի ձերբակալություններն ու արքայը շարունակվում էին, ինչպես տեսանք, նաև 1916 թ. մայիսին: Այս առթիվ պետք է ասել, որ խնդիրը իրատեսական և համոզիչ բացատրություն է գտել Ջ. Կիրակոսյանի դիտարկումներում: Նկատի ունենալով 1915 թ. ապրիլ-մայիսի իրադրությունը՝ նա գրում է. «Անշուշտ, կտեղահանվեր Կ. Պոլսի ամբողջ հայ բնակչությունը, եթե երիտթուրք կառավարողները դրա համար ունենային տեխնիկական հնարավորություններ: Կայսրության մայրաքաղաքը ծանր կացության մեջ էր, Անտանտայի զինված ուժերը լրջորեն սպառնում էին նրան»²⁶: Ջ. Կիրակոսյանը հարում է, որ իթթիհադի կենտրոնում բուռն վիճաբանություններից հետո որոշվեց առայժմ արքայը հայ անվանի մարդկանց, իսկ մնացածներին արքայը ավելի պատեհ ժամանակ:

Հիրավի, այս հանգամանքներն էլ՝ և՛ երիտթուրքերի ներքին տարաձայնությունները, և՛ արտաքին ճնշումները, դարձան ընդհանուր տեղահանության հետաձգման երկու կարևոր պատճառները: Ընդամենը հետաձգման և ոչ թե մայրաքաղաքի հայությանը ամբողջովին տեղահանելու մտադրությունից հրաժարվելուն, յուրատեսակ մի համառության, որ դրսևորվեց մասնակի տեղահանումների գործելակերպով:

Մասնակի տարագրության սարսափներն ապրեց նույն՝ 1915–1916 թթ. նաև զմյուռնահայ համայնքը, սակայն, մայրաքաղաքից տարբերվող պայմաններում: Ջմյուռնական իրադրության նկատմամբ մշտապես զգայուն Աթենքից ստացված մի հեռագիրը վկայակոչելով՝ «Մշակ» թերթը դեռևս ապրիլին ծանուցում էր, որ Ջմյուռնիայում վերսկսվել են հայերի հալածանքները, կատարվել են ձերբակալություններ²⁷: Տեղահանման առաջին քայլերը երիտթուրքերը սկսեցին Ջմյուռնիայի շրջակայքի հայ ազգաբնակչությունից, ճիշտ այնպես, ինչպես Կ. Պոլսում՝ արվարձաններից: Գերմանական դեսպանության՝ 1915 թ. օգոստոսի 9-ի մի տեղեկագրում հայտնվում է, որ «Իզմիրի շրջանի հայկական գյուղերի բնակչությունը էվակուացվել է՝ որոշ հանգամանքներ հաշվի առնելով»²⁸: Պետք է մտաբերել, որ Ջմյուռնիայի շրջակայքից արքայը տեղի է ունեցել 1915 թ. հուլիս-օգոստոս ամիսներին, իսկ թե որ բնակավայրերից և քանի մարդ՝ տեղեկագրում չի նշվում: Մի

²⁵ Գերմանիան և Հայաստանը, էջ 254, 353, 355–356:

²⁶ Ջ. Կիրակոսյան. Առաջին համաշխարհային պատերազմը և արևմտահայությունը, Երևան, 1965, էջ 251:

²⁷ «Մշակ», 28. IV. 1915:

²⁸ Գերմանիան և Հայաստանը, էջ 184:

«Վիճակացույցի» ծանոթագրության մեջ նշված է, որ Բզմիրից և թեմերից հայ բնակիչները տեղահանվել են 1915 թ. օգոստոսին և 1916 թ. փետրվարին²⁹:

1915 թ. Չմյուռնիայից ու շրջակայքից տեղահանումների վերաբերյալ այլ տեղեկություններ չկան և զմյուռնահայերին ձեռք չտալու վիճակը շարունակվեց մինչև 1916 թ. հունիս: Այդ մի անդորր էր զմյուռնահայերի համար՝ Կ. Պոլսի հայության կացության համեմատ, որտեղ, ինչպես տեսանք, ձերբակալություններն ու տեղահանումները շարունակվում էին ամբողջ 1915 թ. ընթացքում՝ մինչև 1916 թ. մայիս: Չմյուռնիայում ստեղծված այս իրադրության վրա իրենց կնիքը դրեցին ոչ միայն Էնվերի, Թալեաթի, Խալիլի և մյուսների՝ մեզ հայտնի տարաձայնություններն ու վարանումները արտաքին ճնշումների առջև, այլև Չմյուռնիայի նահանգապետ Ռահմի բեյի հարաբերականորեն ինքնուրույն կեցվածքն ու գործելակերպը: 1915 թ. օգոստոսին Չմյուռնիայի ու շրջակայքի հայերի մասնակի տեղահանումներին նոր քայլեր չհետևեցին՝ հակառակ դրան դժկամորեն համաձայնած երիտթուրքական կենտրոնի ցանկությունների: Այս տեսակետից խնդիրը բավական լուսաբանվում է գերմանացի լրագրող ֆոն Տիչկայի՝ ռայխսկանցլեր Բ. Հոլվեգին 1915 թ. սեպտեմբերի 30-ին առաքած տեղեկագրում, որտեղ ասվում է. «Չմյուռնիայի և Ադրիանապոլսի վիլայեթներում հայերին թողնում են տեղում, ինչպես նաև մասամբ՝ Կ. Պոլսում... Չմյուռնիայի վալի Ռահմի բեյը և Ադրիանապոլսի վալի Հաջի Ադիլ բեյը հայտարարել են, որ չեն արտաքսի հայերին: Ձեկուցման համար ներքին գործերի նախարարի (Թալեաթի – Ա. Խ.) մոտ ժամանելով՝ երկուսն էլ պնդել են իրենց վճիռը: Կոմիտեում գոյություն ունեցող անհամաձայնության մի փաստ ևս: Թալեաթը ծայրահեղ է, ինչ նա ուզել է՝ մինչև հիմա կատարվել է: Ռահմին ավելի բանիմաց է, քան Թալեաթը և ավելի շատ է աշխարհ տեսել, գործնական է, սակայն նաև մարդասիրական բնավորություն ունի... Նա շատ համախոհներ ունի կոմիտեում»³⁰:

Իրականում Ռահմին միայն գերմանացի լրագրողի պառ հայացքի տակ կարող էր «մարդասեր» թվալ՝ Թալեաթի ծայրահեղ մարդատեցության համեմատությամբ: Այդ երիտթուրքը ևս, ինչպես կտեսնենք, պատրաստ էր ոչնչացնել իր տնօրինությանը հանձնված վերջին հային, սակայն, այն տարբերությամբ, որ եթե Թալեաթի համար հայերի ոչնչացումը սևեռուն գաղափար էր, ապա Ռահմին այդ գաղափարը ծառայեցնում էր երիտթուրքական պաշտոնեության մեջ իր դիրքերի և, անտարակույս, իր բարեկեցության բնագղական գրգիռների բավարարմանը: Մյուս կողմից, և Ռահմին, և Հաջի Ադիլ բեյը, եթե սեփական խաղն էլ չէին սկսել երիտթուրքական վերնախավի միջավայրում, ապա առնվազն հանդես էին գալիս որպես այդ միջավայրում տարաձայնությունները ընդգծված դրսևորող գործոններ: Եվ այս ի-

²⁹ Մ. Մաշտոցի անվան Մատենադարան (այսուհետև՝ ՄՄ), Ա. Ալպոյաճյանի դիվան, -21¹²:

³⁰ Գերմանիան և Հայաստանը, էջ 294:

մաստով հասկանալի է ամերիկյան դեսպան Հ. Մորգենթաուի՝ նրանց տված բնութագրերը: «1915 թ. մարտին, – գրում է նա, – երբ դաշնակիցների նավատորմը կասեցրեց գրոհը (Չանաքկալեի շրջանում – Ա. Խ.) ողջ Օսմանյան կայսրությունը կործանման եզրին էր: Ամենուրեք հայտնվել էին նորելուկ հավակնոտ իշխանիկներ, ովքեր սպասում էին երկրի փլուզմանը, որպեսզի հափշտակեն ժառանգության իրենց բաժինը: Ջեմալը Միրիայում փաստորեն արդեն հիմնել էր անկախ կառավարություն, Ջոյունահայում Ռահմի բեյը՝ գեներալ-նահանգապետը, հաճախ արհամարհում էր մայրաքաղաքի իշխանություններին: Ադրիանուպոլսում Հաջի Ադիլը դավեր էր նյութում սեփական կառավարություն հիմնելու համար... Օսմանյան հպատակների շրջանում արագ տարածվում էր ըմբոստության ոգին»³¹:

Որքան էլ Ռահմին արտաքուստ դժկամություն ցուցադրեր զնյունահայերի տեղահանության հարցում, այդուհանդերձ տեղի էր տալիս իր վերադաս կուսակիցներ Թալեաթի և Էնվերի պնդումներին՝ իրականացնելու տեղահանությունը: Վերջիններիս մտայնությունն էր հայտնում, ի դեպ, երիտթուրքական «Թասվիր-ի էֆրյար» («Կարծիքների արտացոլում») թերթը 1916 թ. հոկտեմբերին իր մի առաջնորդող հոդվածում, երբ «առաջ էր քաշում հայերի արքայի պահանջը այն քաղաքներից և գավառներից, որտեղ նրանց մինչ այդ հանդուրժել էին»³², – ինչպես նկատում էր Կ. Պոլսի գերմանական դեսպանատան հավատարմատար Ռադովիտցը:

Ջոյունահայերի առաջին արքայը կատարվեց 1915 թ. հուլիս-օգոստոսին, այն բանից հետո, երբ Ռահմի բեյը պատվիրել էր իրեն անմոռուց ենթարկվող առաջնորդ Խ. Ինճեյանին՝ ստիպել ժողովրդին, որ ներկայացնի քաղաքում գտնվող «Դաշնակցութեան կոմիտեին պատկանող անհատներուն անուանացանկը՝ իրենց տան հասցեներով միասին»: Առաջնորդարանի դիվանատանը քվեատույփ էր դրվելու և մարդկանց առաջարկվել էր դրա մեջ գցել թղթերին գրված՝ կոմիտեի անդամների, ինչպես և «յեղափոխական գործերու մեջ գտնուած» այլ անձանց անունները: Հակառակ դեպքում Ռահմին սպառնում էր արքայի բոլոր զնյունահայերին: Բնականաբար, վալիի համար դժվար չէր լինելու տույփը բազմաթիվ անուններով լցնելու գործը, որ ի սկզբանե արդեն վերագրվելու էր ժողովրդին: Հաջորդ օրը տույփի մեջ հայտնվում են 300-ի չափ անուններ, սկսվում են ձերբակալությունները, ապա տեղահանումները³³: Հավանաբար, այս 300 անձանց արքայն է տեսել Ա. Գոյումճյանը՝ նրանց անվանելով «Հայ կալանաւորներու առաջին կարաւան»: Դրան հաջորդում են այլ խմբաքանակներ ևս: «Ասոնց ընտանիքներու անդամներուն ալ

³¹ Դեսպան Հենրի Մորգենթաուի պատմությունը, Երևան, 2012, էջ 174:

³² Армянский вопрос и геноцид армян ..., с. 408.

³³ Ա. ԳՈՒՂՆՈՒՄՃԵԱՆ. Իզմիրի մօտաւոր անցեալէն խորհրդածութիւններ. – «Հայրենիք» (Բոստոն), 1956, 12–14 դեկտեմբերի:

չխնայուեցաւ հալածանքը: Նոյն իսկ ծեր այրեր ու կիներ կապանքի տակ կառնուէին եւ կաքսորուէին»³⁴, – գրում է այս հեղինակը:

Նոյն «քվեատուփի» առթիվ Ռահմիի իրականացրած առաջին արտրի մասին է խոսում նաև Լ. Երկանյանի վկայակոչած մի ականատեսը՝ զմյուռնացի տպարանատեր Խոսրով Մատիկյանը, ըստ որի, իրենց ընտանիքը «մաս կազմեց 200 հոգինոց առաջին կարավանին և մեկնեցաւ Բզմիրէն: Քուէատուփի զոհերէն էինք: Հասանք Աֆիոն Գարահիսար, ուր մնացինք: Ամիս մը չանցած՝ Բզմիր վերադարձանք հրամանի վրա, բացի 40-ի չափ կասկածելի նկատուածներէ, որոնց Գոնիա քշեցին»³⁵:

Իս. Մատիկյանը այս արտրը (քվեատուփի առիթով) վերագրում է 1916 թ. հունիսին, իսկ Ա. Գոյումճյանն առհասարակ որևէ թվական չի նշում: Լ. Երկանյանը, որ առավել սթափ է ժամանակի վերարտադրության հարցում, գրում է, որ դեպքը տեղի է ունեցել 1915-ին՝ ինչ-որ «յաֆթա շանթաժի», ինչ-որ քվեատուփի առնչությամբ, որի մասին ինքը գրել է իր հուշերում³⁶: Հետագա ուսումնասիրությունները, թերևս, լրացուցիչ լույս կսփռեն այս հարցի վրա՝ պարզելու «քվեատուփի» այս գործի ճիշտ ժամանակը և այլ հանգամանքներ³⁷:

Կարծում ենք, 1915-ին են վերաբերում Զմյուռնիայի ամերիկյան հյուպատոսի անդրադարձները տեղի դաշնակցական գլխավոր անձանց դեմ երիտթուրքական կենտրոնի մոլուցքի և Ռահմի բեյի՝ այս առթիվ ցուցաբերած վարքագծի մասին: Ռահմին, հայտնում է նա, խիստ հանդիմանություն էր ստացել Թալեաթից՝ «իր գաւառին մէջ պէտք եղած հսկողութիւնը ցոյց տուած չըլլալուն»³⁸, այսինքն՝ տեղահանումների գործում եռանդ չցուցաբերելու համար: Դրանից հետո նա կազմակերպում է ընդհանուր «դավադրության գործը» և սպառնում ամբողջ հայ համայնքը հետիոտն արտրել Անկարա, եթե իրեն չհայտնեն հեղափոխական 15 պարագլուխների անուններ: «Կերպով մը, – հայտնում է նախկին հյուպատոսը, – տասննհինգ անուններ «գտաւ» և յայտարարեց, թէ պիտի կախի այդ անձերը»³⁹:

Այդ առիթ է տալիս, որ 70 հայ ընտանիքներ գիշերը քնից հանվեն և արտրվեն «Իբրև թէ Էնկիւրի»: Իր հերթին դեսպան Մորզենթաուն գրում է, որ Զմյուռնիայի ամերիկյան հյուպատոսը (Նորթոնը) իրեն տեղեկացրել էր, որ յոթ հայեր դատապարտվել են կախադանի՝ 1909 թ. գործած ինչ-որ անորոշ հանցանքի համար: «Մա-

³⁴ Նոյն տեղում, 14 դեկտեմբերի:

³⁵ Լ. Երկանյան. Յուշեր ու փուշեր. – «Յուսաբեր», 1957, 3 յունիսի:

³⁶ Նոյն տեղում, 4 յունիսի:

³⁷ ՄՄ, Ա. Ալպոյաճյանի դիվան, -21¹⁰:

³⁸ Նոյն տեղում:

³⁹ Դեսպան Հենրի Մորզենթաուի պատմությունը, էջ 262:

կայն ոչ Ռահմի բեյը, ոչ էլ զինվորական հրամանատարը չէին հավատում այդ մեղադրանքներին»⁴⁰:

Ռահմին, որ երկակի խաղ էր խաղում զմյուռնահայերի և Կ. Պոլսի կենտրոնի հետ, դիմում է վերջինիս՝ մահվան դատավճիռը իր կողմից չիրագործելը հիմնավորելով այն բանով, որ, ըստ օսմանյան օրենքների, դատապարտյալներն աղերսագիր գրելու իրավունք ունեն։ Կենտրոնից եկած պատասխանը որևէ նոր բան չէր ավելացնում երիտթուրքերի ցինիզմին. «Տեխնիկապես դուք իրավացի եք. Նախ կախեք նրանց, հետո ուղարկեք ներման խնդրանքը»⁴¹, – ասված էր այնտեղ: Ռահմին պատրաստ էր լվանալու իր ձեռքերը, սակայն, բարեբախտաբար, Մորգենթաուի միջամտության շնորհիվ բոլոր դատապարտյալներն ազատ արձակվեցին:

Ինչ վերաբերում է Ռահմիի գործողություններին և անգամ բացահայտորեն հակասական թվացող նրա վարքագծին, այդ ճանաչված իթթիհատական գործիչը և «դյունմե»-ն, հիրավի, «մաքիավելիական» ճկունություն էր ցուցադրում պատերազմի տարիներին⁴², երիտթուրքական առաջնորդների մշակած՝ մասնակի տեղահանություններով սկսելու և դրանք զանգվածայինով ավարտելու մեթոդը օգտագործելով Կ. Պոլսի իր գլխավորների հետ ունեցած հարաբերություններում՝ միշտ ելնելով սեփական շահերից ու չափազանց սրված ինքնապաշտպանական բնագոյաց: Երբ կենտրոնը Ռահմիից պահանջել էր Զմյուռնիայից արտրել բոլոր լեվանտացիներին (թուրքաբնակ եվրոպացիներ), նա իր մոտ է հրավիրում անգլիացի Ջ. Հորթոնին և հայտնում. եթե ինքը հրաժարվի ի վերուստ եկած հրամանը կատարելուց, ապա պաշտոնանկ կարվի, իսկ եթե կատարի հրամանը, արտրյալներն հազիվ թե ողջ մնան: Ապա պարզում է իր մտադրությունը՝ անել մի ինչ-որ բան, որ թվա, թե հրամանը կատարում է, այսինքն, կաքսորի միայն վատահամբավներին ու աղքատներին, իսկ մինչև հերթը հասնի մյուսներին, կարելի է հուսալ, որ փոփոխություններ կլինեն⁴³: Նույն ոճը զգացնել է տալիս Ռահմիի՝ հայերի հետ ունեցած հարաբերություններում, համենայն դեպս, մասն ամբողջով փոխարինելու դեպքում⁴⁴:

⁴⁰ G. Milton. Paradise Lost, Smyrna 1922, London, 2008, p. 87.

⁴¹ Նույն տեղում, էջ 86–87:

⁴² Նույն տեղում, էջ 15:

⁴³ Նույն տեղում, էջ 98–99:

⁴⁴ Թեոդիկը Ռահմիի այս գործելակերպը նկատի ունի, երբ բավականաչափ միանշանակ է բնութագրում նրան: «Իզմիրի կուսակալ Րահմի, – գրում է նա, – կեղրոնէն բխող ամէն հրահանգի հակառակ, պաշտպանած է այդ նահանգին հայոց մեծամասնութիւնը՝ կուսակցականներն ու անոնց ընտանիքները միայն մաքրելով քաղաքէն» (Թ է ո դ ի կ. Ամէնուն տարեցոյցը, Կ. Պոլիս, 1916–1920, էջ 184): Թեոդիկը, անշուշտ, անգիտանում է նույն Ռահմիի գործողությունները 1916 թ. նոյեմբերին, երբ այս անգամ նա ձեռնարկել էր զմյուռնահայերի զանգվածային տեղահանումները և որը խափանեց 5-րդ բանակի գորահրամանատար, գերմանացի գեներալ Լ. ֆոն Սանդերսը: Ռահմին լիովին բացասաբար է ներկայացված ըստ մեկ

1916 թ. հուլիսի 10-ի թվակիր մի փաստաթղթում, որ հրապարակել է Յո. Լեփսիուսը, ասվում է, որ տեղահանվել են Զմյուռնիայի շրջակայքի հայ առաքելականների հետ համեմատած՝ փոքրամասնություն կազմող բողոքական և կաթոլիկ հայերը⁴⁵: Տիրահռչակ քվեատուփի առթիվ ևս, կամ դրանից առաջ, մի վկայության համաձայն, կենտրոնին գոհացում տալու նպատակով Ռահմին պահանջել էր Խ. Ինձեյանից և տեղաբնակ որոշ ջոջերից՝ տալ մի քանի տասնյակ ընտանիքների՝ աքսորելու համար⁴⁶, բնականաբար, հանդես գալով որպես զանգվածային տեղահանումները կանխող պաշտոնյա:

Շատ ավելի կտրուկ, բայց և դարձյալ իր երկդիմությունը պահպանելով՝ չքմեղանալու ուղեգիծ էր ընտրել Ռահմին, կազմակերպելով հույների զանգվածային աքսորը 1914 թվականին: Մոտ 4 հազար հույներ, գրում է Լ. Երկանյանը, Բերգամայի և շրջակայքի հույների դեմ պողոկացող սպառնալիքի օրերին, փախան Հունաստան, և որ վալին էր այդ ողբերգության նենգմիտ հեղինակը. «Ոչ ջարդել, ոչ ալ աքսորել տուած էր: Յոյները իրենք իրենց մեկնէր էին (ահաբեկումներից հետո – Ս. Խ.)... Բահմին որեւէ կերպով պատասխանատու չէ, եւ պրծաւ»⁴⁷:

Պետք է կարծել, որ 1915 թ. օգոստոսից հետո և մինչև 1916 թ. մայիս, ինչպես Կ. Պոլսում, Զմյուռնիայում ոչ մեծ խմբերով կամ անհատապես շարունակվել են հայերի ձերբակալություններն ու աքսորը, որի մասին, ինչպես տեսանք վերը, վկայում էր պատրիարք Զավենը 1916 թ. մայիսին, հիշեցնենք՝ ամեն շաբաթ: Զմյուռնահայերի տեղահանությունների մեջ առավել նշանակալին և աղմկահարույցը եղավ 1916 թ. նոյեմբերի միջադեպը, որին խառնվեց Լ. Ֆոն Մանդերսը: Աքսորի առիթը, ինչպես միշտ, հորինել էր Ռահմին, որի մասին հայտնում էր գերմանացի դիվանագետ Ռադոլփսը՝ նոյեմբերի 13-ի իր հեռագրում: Կաթոլիկական գերեզմանատանը, հայտնում է նա, հայտնաբերվել էին հին ռուբեր և զինամթերք, որոնք, «ասում են, այնտեղ էին թաքցրել հայերը»: Այդքանն էլ բավական էր, որ վալին պահանջի առաջնորդ Խ. Ինձեյանից և համայնքից, որ հայտնեն կասկածելի անձանց անունները և հանձնեն պահած զենքերը: Նոյեմբերի 2-ին կատարվեցին բազմաթիվ ձերբակալություններ, իսկ հաջորդ օրը 300 հայեր՝ ընտանիքներով, աքսորվեցին երկաթուղով: «Դրանց պետք է հետևենին աքսորյալների հերթական շարքերը», – գրում է դիվանագետը: Կնշանակի, Ռահմին անցել էր ամբողջ համայնքի զանգվածային

այլ վկայության. «Բահմի պէ... չտեղահանեց Բզմիրի հայերը՝ փոխարեն մեծագումար կաշառքի մը: Տեղին հայ հարուստները յաջողած էին ոսկիով գնել անոր ազդեցութիւնը ի նպաստ իրենց» (տե՛ս Ս. Ալ պ օ յ ա ճ ե ա ն. Յուշամատեան կուտինահայերու, Պէրրութ, 1961, էջ 228):

⁴⁵ Գերմանիան և Հայաստանը, էջ 327:

⁴⁶ ՄՄ, Ա. Ալպոյաճյանի դիվան, -21²:

⁴⁷ Լ. Երկանյան. – «Յուսաբեր», 1957, 5 յունիսի:

տեղահանման գործողություններին: «Աքսորը ղեկավարում է Ջմյուռնիայի ոստիկանապետը, որին վալին գործողության ազատություն է ընձեռել»⁴⁸, – հարում է Ռադովիտցը:

Յո. Լեփսիուսը հրատարակել է Լ. Ֆոն Սանդերսի 1916 թ. նոյեմբերի 16-ի տեղեկագիրը կայգերական դեսպանությանը՝ այս դեպքերի վերաբերյալ: Նոյեմբերի 8-ին բազմաթիվ ձերբակալվածներ աքսորվեցին, իսկ նոյեմբերի 10-ի առավոտյան նա իր գլխավորած բանակի շտաբի պետ Քյազիմ բեյին ուղարկում է վալիի մոտ՝ իր անունից հայտնելու, որ նման զանգվածային ձերբակալություններն անհանդուրժելի են և քաղաքին վտանգ են սպառնում: Եվ եթե ոստիկանությունը շարունակի իր միջոցառումները, ապա ինքը ռազմական ուժով կարգելի դրանք: Գեներալը վալիին ժամանակ է տալիս մինչև նույն օրվա (նոյեմբերի 10-ի) կեսօր: Կեսօրից հետո Սանդերսի մոտ է գալիս Քյազիմ բեյը և հայտնում, որ վալին խոստացել է ձերբակալությունները և տեղահանումները դադարեցնել, որոնք այլևս չեն կրկնվի⁴⁹: Հաջորդ օրը հանդիպում են Սանդերսը և Ռահմին: Վերջինս անհիմն է համարում Ռահմիի պատճառաբանությունները հայերի տեղահանումների հարցում և պահանջում է նրանց համար ապահովել անվտանգ պայմաններ⁵⁰:

Ուշագրավ է, որ Ռահմին արդարանալու համար բացատրում է, որ Ջմյուռնիայի երիտթուրքական կոմիտեն իրենից մշտապես դժգոհ է եղել հայերին խնայելու համար և որի պատճառով իր դիրքերը խախտու են դարձել Կ. Պոլսում, որտեղից էլ գալիս է հայերի աքսորի պահանջը⁵¹: Ի վերջո, գեներալը Ռահմիից ստանում է գրավոր հավաստումներ, որ տեղահանումներին վերջ կտրվի և որ այն հայերը, ովքեր անմեղ են, հետ կդարձվեն աքսորից⁵²: 1916 թ. նոյեմբերի 25-ի հեռագրով Գերմանիայի դեսպան Քյուլմանը հաղորդում էր, որ հայերի տեղահանումները Ջմյուռնիայից դադարեցված են և որ գործը դրանով փակվել է⁵³:

Անկախ գերմանացի գեներալի հայանպաստ գործողությունների քաղաքական նկատառումներից, մասնավորապես թուրքական դահիճներից սահմանազատվելու մտայնությունից, Ջմյուռնիայի հայությունը աշխարհամարտի տարիներին տեղահանումներից փրկվեց նրա շնորհիվ: «Չըլլար Չանտերս, կուսակալ Բահմին՝ հայատեաց և հայահալած՝ անապատ պիտի դրկեր Իզմիրի ամբողջ հայութի-

⁴⁸ Армянский вопрос и геноцид армян..., с. 408.

⁴⁹ Գերմանիան և Հայաստանը, էջ 345–346:

⁵⁰ Նույն տեղում, էջ 346:

⁵¹ Армянский вопрос и геноцид армян..., с. 408.

⁵² Յո. Լեփսիուսի նշվ. աշխ., էջ 347:

⁵³ Նույն տեղում:

նր»⁵⁴, – իրավացիորեն գրում է Լ. Երկանյանը: Նույն եզրակացությանն է հանգել նաև Վ. Տատրյանը⁵⁵:

Մաշտոցյան մատենադարանում պահվող մի վավերագրում՝ «Պատասխանիք պատրիարքարանի հարցարանին» վերնագրով, որ պատրիարքարանին է հղել Զմյուռնիայի հայոց առաջնորդարանը 1919 թ. դեկտեմբերի 3-ին, արձանագրված է, որ տեղի հայ բնակչությունը մասնակի տեղահանության է ենթարկվել 1915 թ. նոյեմբերի 15-ին և 1916 թ. հոկտեմբերի 25-ին. քիչ անց հայտնվում է նաև, դարձյալ մասնակի, 1915 թ. դեկտեմբերի աքսորի մասին⁵⁶: Առնվազն տարօրինակ է, որ այստեղ լռության է մատնված 1916 թ. նոյեմբերի 8–9-աքսորի բավական աղմուկ հանած Լ. Ֆոն Սանդերսի միջամտության հետ կապված իրողությունը: Թերևս, պատճառն այն էր, որ առաջնորդարանը հարցարանին պատասխանել է զինադադարին հետևող խառնակ ամիսներին, երբ հաճախ փաստերին կարող էր փոխարինել միշտ պատրաստի, բայց ոչ այնքան ճշգրիտ հիշողությունը:

Պետք է կարծել, որ Զմյուռնիայի շրջակա բնակավայրերի հայությունը շատ ավելի ծանր հարվածների ենթարկվեց տեղահանությունների տարիներին, քան քաղաքի բնակչությունը: Մանավանդ ինքը՝ Ռահմին, հետևում էր մայրաքաղաքի երիտթուրքական պարագլուխների ուղեգծին՝ տեղահանությունները նախ սկսել արվարձաններից, մերձակայքից ու պանդուխտներից, հետո անցնել բուն քաղաքի հայ բնակչությանը: Վերոհիշյալ առաջնորդարանի տվյալներով տեղահանվել են «Գուշատա՝ ամբողջովին, 1916 թ. փետրվարին, Տիքիլի՝ ամբողջովին, 1915 օգոստոս, Քրքադա՝ 1915 թ. նոյեմբեր, մասնակի, Էռտեմիշ՝ մասնակի, 1916 նոյեմբեր, Պերկամայի շրջակայքը՝ Ֆրնուզ»⁵⁷:

Վիճակագրությունից դուրս են մնացել, ինչպես տեսնում ենք, Զմյուռնիայի շրջակայքի բազմաթիվ այլ բնակավայրեր, որոնց մասին, ցավոք, ցայժմ տվյալներ չկան:

Մնում է անդրադառնալ այս ամենին հետևող հարցին՝ 1915–1916 թթ. քանի՞ մարդ ենթարկվեց մասնակի տեղահանումների: Դրան վերաբերող որոշակի տվյալները շատ կցկտուր են և առնվազն այդպիսին էլ կմնան, քանի դեռ փակ են թուրքական համապատասխան արխիվները և եթե որևէ բան պահպանված լինի դրանցում: Ուշագրավ են Յու. Հալաչօղլուի վերհանած՝ Թուրքիայի ռազմական պատմության և ռազմավարական հետազոտությունների վերահսկողության վարչության տվյալները (1914–1918 թթ.): Դրանց մեջ նշված է նաև Զմյուռնիայից ար-

⁵⁴ Լ. Երկանյան. նշվ. աշխ., «Յուսաբեր», 1957, 4 յունիսի:

⁵⁵ В. Н. Дадрян. նշվ. աշխ., էջ 292:

⁵⁶ ՄՄ, Ա. Ալպոյաճյանի դիվան, թղթ. 8, վավ. 21³, էջ 1–2:

⁵⁷ Նույն տեղում, էջ 1:

ստրված հայերի թիվը՝ 256 մարդ⁵⁸։ Ինչ վերաբերում է այն հարցին, թե որտեղ են տարվել արտոյալները, ապա Ջմյունիայի առաջնորդարանի տվյալներով՝ Աֆիոն Կարահիսար, Կոնիա, Հալեպ և Դեր-Ձոր։

Ե՛վ Կ. Պոլսի, և՛ Ջմյունիայի հայերի՝ այս տարիներին կրած արհավիրքների պատմությունը բացահայտելիս առաջ է գալիս ևս մեկ հարց՝ զանգվածային տեղահանումներից նրանց զերծ մնալու պատճառների հարցը։ Այդպիսիք են.

1. Գերմանիայի արտաքին քաղաքականության մեջ, անկախ հայերի ցեղասպանության գործում այդ պետության մեղսակցության չափերից, 1916 թ. նկատելի դարձած՝ հայերին բնաջնջելու երիտթուրքական ծրագրից սահմանազատվելու ուղեգիծը։ Այն դրսևորվեց ոչ միայն Օսմանյան Թուրքիայում գերմանական հյուպատոսների և դեսպանության զեկուցագրերում, այլև գերմանական բարձրաստիճան զինվորականության մեջ։

2. Ցեղասպանության դեմ միջազգային հանրության բողոքները, անգամ Օսմանյան Թուրքիայի ռազմավարական դաշնակիցների բացահայտ անբավականությունը։

3. Կ. Պոլսի և Ջմյունիայի հայ համայնքների ճանաչողական արժեքը Թուրքիայի սահմաններից դուրս, դրանց լինել-չլինելու հիմնահարցը մի հայտնի չափով վարանումներ էր մտցնելու երիտթուրքական կառավարողների վարքագծում։

4. Երիտթուրքական գործիչների մեջ իրենց իսկ կազմակերպած ցեղասպանության պատասխանատվությունից խուսափելու կամ դրանից ապահովագրվելու տրամադրությունները։ Կ. Պոլսի հայերի վրա տեղահանումները տարածելու հարցը երիտթուրքական կենտրոնում 1915–1916 թթ. տեղիք է տվել սուր տարաձայնությունների, որով էլ բացատրվում է տարամիտող կողմերից մեկի կամ մյուսի տեսակետի գերակշռությունը և որի հետևանքով՝ մասնակի, ոչ ամբողջական տեղահանումների անկանոն պռոթկումները նշված տարիներին և ի վերջո՝ պոլսահայերի խնդիրը հետաձգելու, և ապա տեղահանումներից հրաժարվելու մտայնությունը համակերպվելը նշված կենտրոնի կողմից։

5. Ջմյունահայ համայնքի պարագայում ևս 1915–1916 թթ. իրողություն դարձան մի քանի անգամ կիրառված տեղահանումները, սակայն, Կ. Պոլսի համեմատ՝ որոշակի տարբերություններով. այստեղ նշանակություն ունեցան ազդեցիկ նահանգապետ Ռահմիի անհատական որակները՝ ամբողջական տեղահանումների հարցում երիտթուրքական վերնախավին դիմակայելիս և հաջողելը՝ այդ հարցը սահմանափակել, գոնե մինչև 1916 թ. նոյեմբեր, մասնակի տեղահանումների շրջանակներում։ Ընդամին վերը նշված որակների մեջ չեն բացառվում նահանգապետի ամենին էլ ոչ շահադիտական մղումները կամ կենտրոնի ոճրապարտ գործողությո-

⁵⁸ Y. H a l a ç o ğ l u. Sürgünden soykırımı Ermeni Idialeri. Istanbul, 2010, s. 64.

յուններից սահմանազատվելու միտումները: 1916 թ. նոյեմբերին, սակայն, Ռահմին տեղի է տվել երիտթուրքական պարագլուխների ճնշումներին և ձեռնարկել զմյուռնահայերի նոր կա՛մ մասնակի, կա՛մ, որ առավել հավանական է թվում, ամբողջական տեղահանումները, որոնք խափանվեցին գերմանական բարձրագույն հրամանատարության դիրքորոշմամբ, ի դեմս 5-րդ զորաբանակի հրամանատար Լ. ֆոն Սանդերսի վճռական գործողությունների:

О ДЕПОРТАЦИИ АРМЯНСКОГО НАСЕЛЕНИЯ КОНСТАНТИНОПОЛЯ И
СМИРНЫ
(1915–1916 ГГ.)

АЛЬБЕРТ ХАРАТЯН

Резюме

Депортация армян Константинополя и Смирны не имела массового характера и в основном была обусловлена внешнеполитическими причинами. Депортация константинопольских армян была предпринята младотурками 24 апреля 1915 г., когда в течение нескольких недель были заключены в тюрьмы тысячи армян – представители интеллигенции, партийные деятели, духовенство и т. д. В июле–августе и октябре–ноябре 1915 г. были депортированы тысячи людей, а после апрельских и майских депортаций, коснувшихся в основном неженатых армян-скитальцев, должна была последовать массовая депортация константинопольских армян, которая продолжалась до мая 1916 г.

Армяне Смирны и ее окрестностей были депортированы несколькими этапами: в июле–августе 1915 г., затем в феврале и июле 1916 г., когда из католических и протестантских общин армяне ссылались семьями. 8 ноября 1916 г. началась массовая депортация армян Смирны, были депортированы 300 чел. 9 ноября эти действия были пресечены немецким генералом Л. Фон Сандерсом, принудившим вали Рахми положить конец этим насильственным мерам. В ряду причин, содействовавших спасению армян Константинополя и Смирны от массовых депортаций, следует выделить ориентированность внешнеполитического курса Германии на неприятие геноцидальных действий Османской Турции, открытое недовольство стратегических союзников Турции, равно как и разноречивость мнений младотурецких правителей по вопросу изгнания константинопольских и смирнинских армян.

ABOUT THE DEPORTATION OF THE ARMENIANS OF CONSTANTINOPLE AND
SMYRNA
(1915–1916)

ALBERT KHARATYAN

S u m m a r y

During the Armenian Genocide the Young Turks started the deportation of the Armenians from Constantinople on April 24 1915, when thousands of thinkers, party leaders, priests and others were arrested in a few weeks. Then, in July–August and October–November 1915 followed the deportation and slaughter of thousands of Armenians. These genocidal actions against the Armenians of Constantinople continued until May 1916.

The Armenians of Smyrna and its surroundings were subjected to deportation several times: first in July–August 1915, and then in February and July 1916, when families from Catholic and Protestant communities were deported. On November 8 1916 the Turkish governor Rahman organized the Smyrnian Armenians' massive deportation, 300 people were deported, and they were followed by the next groups of deportees. On November 9 this genocidal process was prevented by the German General L. Von Sanders, who (by the threat of military intervention) forced Rahman to stop deportations. Among the causes of avoidance by the Armenians of Constantinople and Smyrna from the larger scale deportations should be mentioned a trend in the German foreign policy of dissociation from the Ottoman Empire's genocidal actions and the latter's strategic allies' dissatisfaction with those actions.